
COMUNICATO STAMPA

FESTIVAL EUROPEAN DE CJANÇON IN LENGHE MINORITARIE

SIELZÛTS I NÛF FINALISCJ DI SUNS 2012

Udin, ai 20 di Setembar 2012 - La zurie internazionâl di SUNS 2012 e à proclamât i nûf finaliscj che a varan acès ae fase finâl dal festival european de cjançon in lenghe minoritarie proviodût pai 2 di Novembar, aes 21, al teatri Palamostre di Udin.

Doi i grups furlans che a sunaran dal vîf i lôr tocs, sielzûts jenfri plui di cuarante partecipants aes selezions e rapresentatîfs di dîs diferents comunitâts linguistichis: i Jo No Kognos, grup codroipês che si presente cu la cjançon "Mai Mai" e il zovin cuintet punk cjargnel dai Mig 29 over Disneyland che al puarte al festival "Profitadôrs".

I altris grups e cjantants sielzûts de zurie, formade di Andrea Ioime (il Friuli - il Gazzettino), Onno Falkena (Omrop Fryslan - Liet Foundation) e Paolo Cantarutti (Radio Onde Furlane) a son: il cjantautôr francprovenzâl Billy Fumey; il grup rock electronic dai Cha Da Fö che al cjante in retoromanç dai Grisons svuizars; i catalans di Alghero Claudia Crabuzza e Claudio Gabriel Sanna; il cjantautôr ladin Jean Ruaz; il rap de Sardegne di Randagiu Sardu de Sardegne; Ruben Dimitri che al interprete il rock pop de minorance cravuate dal Burgenland in Austrie e i Somi de Granadas, grup folk acustic de Ocitanie francese.

Il festival de cjançon tes lenghis minoritariis, inmaneât de ARLeF - Agenzie regionâl pe Lenghe furlane dutun cun Cooperative di Informazion Furlane, al è rivât ae cuarthe edizion e si conferme tant che un dai events musicâls di plui interès, come che e dimostre la grande partecipazion di artiscj che e cres in maniere costante an daspò an.

Nassût par promovi i ferments musicâi plui inovatîfs cjantâts tes plui vielis lenghis des comunitâts linguistichis, il festival al fâs di Udin une altre volte la capitâl de musiche tes lenghis mancûl pandudis, viodût che la sô organizazion e rive daspò un an esat dal gran sucès dal Liet international, il plui grant event di setôr che si è tignût l'an passât in Friûl.

E propit ae fase finâl dal Liet, che si davuelzarà chest an a Xixón - Gijón tes Asturiis il prin di Dicembar, a vignaran ametûts i doi artiscj che a cjaparan il prin premi de zurie e dal public.

Fûr concors, invezit, SUNS al ospitarà il grop ORKA, une band pardabon originâl che e ven des isolis de Danimarcje Far Oer, arcipelac che si cjate tal nord dal ocean Atlantic tra Scozie, Norvegje e Islande. I ORKA, vincidôrs tal 2009 dal Liet, a rapresentin il sun de lôr tiere e a sunin musiche eletroniche doprant struments che a àn costruît di bessôi.

Elisabetta Pozzetto

Regjon Autonome Friûl Vignesie Julie
[ARLeF – Agenzie Regjonâl pe Lenghe Furlane](#)
Place XX Setembar 23
33100 Udin

0039 0432 555724 fax 0432 204158
mob 0039 335 8002058